

BON DIA YEN DI ALEGRIA!

Skirbi pa: Ruthy "Lady Ruth" Vrieswijk-Bergen



ORA tin varios tema di actividadnan cu a tuma lugar y nos tin hopi cos bunita di skirbi di nan, pero nos no por corda tur detayes, hahahaha! Pero...potretnan bunita por papia pa nan mes e ora ey, no ta asina? Nos relato di e siman aki ta dedica na nos Dia Nacional. Despues nos lo toca e otro bunita actividadnan cu a tuma lugar recientemente.

Pa nos, nos celebracion di nos Dia di Himno y Bandera a cuminsa diabierna anochi, ora cu a inaugura e bunita Plaza Padu den centro di Oranjestad, memey di invitadonan y un publico hopi grandi. Tur cu a bin duna homenahe na nos tata di cultura Juan Chabaya "Padu" Lampe, cu tin e bendicion di por mira na bida un bunita Plaza dedica na dj'e na su nomber: "Plaza Padu".

Un anochi di fiesta cultural cu dushi canto, musica y baile. E orkesta a toca bunita, Landa, Edwin y Victor Samuel a canta bunita y a trece hopi dushi ambiente riba Plaza Padu.

Ki bunita palabranan di bendicion di Pastor Jairo prome cu e famianan di e tres baluartenan Padu, Hubert y Rufo a inaugura e Plaza, kitando e tela firme cu tabata tapa e estatuanan di e tresnan aki, dos di nan sinta na Piano y un di nan para.

Ta pa su mayan mainta Lady Ruth durante su keiromento riba Dia Nacional, a wak kennan tabata sinta ta toca piano y ken ta para ta dirigi. Ah si! Lidwina, un di e yiu muhenan di Lio tambe a canta masha bunita mes, tocando su guitarra.

Despues mas laat e invitadonan y publico presente por a gosa di e musico pianista internacional Raul di Blassio, kende a duna un tremendo show cu su tokenan gracioso tambe.

Hasta bendicion di un crenchi awa cu a fingi fingi e Plaza bunita aki a haya caba e diabierna anochi ey. Bendiciona hasta e fontein bunita cu tin su adornonan di e teclanan di piano.

Padu, nos dushi Padu tabata central y den centro di tur atencion cu despues hopi hende a bin saca potret di nan hunto cu Padu. Ma mi n' bisabo cu mi no por corda tur detayes tur ora ora tin mas di un actividad bunita den e mesun siman? Mi a lubida di menciona e prinses di Padu, Vivian, kende tambe a toca piano bunita e anochi ey, hunto cu e orkesta. Vivian a mostra asina elegante cu su bunita peinado y make up!

Diasabra dia 18 di maart mes, mi casa y ami a busca nos mayorman pa dal un keiro riba isla cu nan pa wak e banderanan ta bula den biento, con nan ta baila. Nos a bay pa compra sopi na Cas di Cultura, pero ainda no ta tur e sopinan a wordo treci, pues, nos a sigui keiro y a bay compra algo di come na un otro caminda. Mas atardi mi casa cu mi a sigui keiro un tiki toch, en busca di sanger yena pa nos grandinan, pero esnan cu nos a logra compra riba Plaza den curason di Sta. Cruz tabata gama so, nan no tabata bon teni hunto. Pero, nos a gosa si di e snacknan di Dabaru di The Kelkboom kitchen, kendenan tambe tabata presente na Sta. Cruz. Dushi pa topa cu nos dushi hendenan rib'e bunita Plaza ey y combersa un crenchi. Nos a yega cas tur cansa y soda di nos dushi solo radiante cu nos curason contento y yen di gradicimento pa un otro bunita celebracion di nos Dia Nacional. Asina cansa cu nos a pega soño lubida di wak e bunita concierto di Edjean Semeleer cu su grupo di artistanan den Ser'i Noka. Pero...nos a gosa di wak tur e bunita impresionnan di potret riba Facebook!!! Pabien Edjean!!! You did it!!!

Slaap uit mainta, lubida di wak e parada di gruponan uniforma na television! Uffff, esey ta pasa ora edad ta subi lentamente suavemente, hahahaha. Pero..."all in all" nos a gosa hopi di nos Dia Nacional, dia 18 di maart 2017. Danki pueblo pa boso bunita comportacion!